

Nipilersortartut immiussinissamut aningaasartuutaannut 10.000 kr.tikillugu tapiissummik misiliutaasumik 2021-miit augustip aallaqqaataani atuutilersussamik Naalackersuisut pilersitseqqullugit Inatsisartut aalajangiiffissaattut siunnersuut. Katillugu ukiut marluk ingerlaneranni 300.000 kr.-nik aningaasalerneqassaaq, Nunatsinni nipilersukkanik saqqummersitsisarnerup siuarsarnissaanik siunertalimmik. Misilittagaalersimasut nalilersuinissamut atorneqassapput avammut tunisassiornikkut kiisalu eqqumiitsuliornikkut siuariarsimanermut sunniuteqarsimanersut.
(Inatsisartunut ilaasortaq Aqqalu C. Jerimiassen, Atassut)

Akissuteqaat

(Ilinniartitaanermut, Kultureqarnermut Ilageeqarnermullu Naalackersuisoq)

Siullermeerneqarnera

Naalackersuisut Inatsisartuni ilaasortaq Aqqalu C Jerimiassen, Atassut, Inatsisartut aalajangiiffigisassaattut siunnersuummik saqqummiussaqqarmat qujapput.

Naalackersuisut eqqumiitsuliortortatta pikkorissut, nutaaliortut isumassarsiullaqqissullu ulluni makkunani pissutsinut ilungersunartunut Covid-19-ip pilersissimasaanut allatut ajornartumik naleqqussarsimanerat arajutsisimannngilaat. Ilaatigut nipilersortartorpassuit piginnaasaminnik nittarsaassinermikkut inuit qarasaasiatigut naapittarfiinik atuisut takusarsimavagut, immaqalu siornatigornit tusarnaartussat amerlanerit taamaaliornermikkut angusarsimassallugit. Kultureqarnermut Naalackersuisutut eqqumiitsuliortortavut naleqqussarluarsinnaasut tulluusimaarutigaaqka.

Naalackersuisut aningaasaliissutissanut qinnuteqartarfimmik nipilersortartut qinnuteqarfigisinnaasaannik pilersitsissasut, aaqquissuussarlu ukiuni marlunni atuutissasoq, siunnersuuteqartoq siunnersuuteqarpoq. Misiliummut aningaasaliissutinik 300.000 kr.-iusunik ukiunut marlunnut avinneqartunik aningaasaliissuteqartoqartarnissaa, qinnuteqartumullu ataatsimut 10.000 kr.-inik qinnuteqartoqarsinnaanissaa siunnersuutigineqarpoq.

2020-mi saqqummersitsinissanut qinnuteqartut ataasiakkaat missingersuutaannut agguaqatigiissitsineq Kultureqarnermut Naalackersuisoqarfiup naatsorsuiffigisimavaa. Ukiuni tassani qinnuteqaatini 13-iusuni tiguneqartuni agguaqatigiissillugu missingersuutit 45.000 kr.-iusimapput, taakkulu tapiissutigineqartussatut siunnersuummut sanilliullugu sisamariaat sinnerlugu amerlanerupput. Tamanna aallaavigalugu saqqummersitsinerit amerlanerusut piviusunngortissinnaajumallugit 10.000-it angullugit immiussinermut aningaasartuutitut tapiissutit pillugit Naalackersuisunut nalileruminaappoq. Taamaattumik Naalackersuisut isumaqarput sammineqartoq suleqatigiiffiit attuumassutillit peqatigalugit oqaluuserineqartariaqartoq.

Siunnersuuteqartup oqaatigaa ullumikkut aningaasanut inatsimmi imaluunniit kulturi pillugu inatsimmi atuuttumi tapiissutitut aqqissuussinissamut siunnersuutigineqartoq periarfissaqanngitsoq, taamaattumillu suliniut kulturi pillugu inatsimmik tunngaveqarluni aallartinneqarsinnaanani. Naatsorsuutigineqarpoq eqqumiitsuliorneq pillugu inatsit siunnersuuteqartup pigaa. Tassani aallaaviuvoq, siunnersuuteqartup tapiissuteqarnermut aqqissuussineq misiliummik aqqissuussinertut siunnersuutigimmagu.

Naalackersuisut aamma kommunalbestyrelsi sunut tapiisinaanersut Eqqumiitsuliornermik ingerlatsineq pillugu Inatsisartut inatsisaat nr. 11, 6. juni 2016-imeersumi (eqqumiitsuliorneq pillugu inatsit) malittarisassani § 8-mi aalajangersarneqarpoq. Ilaatigut tassunga ilaapput eqqumiitsuliorluni suliat ineriartortinneri suliarinerinerilu. Tapiissuteqarnermut aqqissuussinerup siunnersuutigineqartup tamatumaa iluani inissaqartinneqarsinnaasooq, taamaalillunilu eqqumiitsuliorneq pillugu inatsimmut akerliunngitsoq Naalackersuisut nalilerpaat.

Eqqumiitsuliorneq pillugu inatsimmi § 8, imm. 3-mi aalajangersarneqarpoq, Naalackersuisut eqqumiitsuliornermik ingerlatsinerneq saqqummiinermullu tapiinissamut malittarisassanik aalajangersaassapput, tamatumunnga ilanngullugit tapiiffigineqarsinnaasut killilersornerat, tullerriaarinissamut piumasaqaatit, tapiissutit suussusii annertussusiilu, tapiinissamut piumasaqaatit, tapiinermi atugassarititat, qinnuteqaatinut piumasaqaatit, periusissat, allaffissornikkut aqutsineq aamma naammagittaalliorneq. Tapiiffigineqarnissamut piumasaqaatit tapeeriaatsillu pillugit nalunaarutip suliaritinneranut sulineq Naalackersuisut aallartippaat. Sulinerneq tassani tapiissuteqarnermut aqqissuussinissamut siunnersuut ilanngunneqarsinnaasaaq. Tassunga atatillugu oqaatigineqassaaq, eqqumiitsuliorneq peqatigiiffii sulinerneq ilanngutitinneqassammata, taamaalillunilu aamma peqatigiiffiit tapiissuteqarnermut aqqissuussinissamut siunnersuutigineqartumut oqaloqatigininnissamut periarfissaqassallutik.

Siunnersuuteqartup misiliummik aqqissuussinerup katillugit 0,5 mio. kr.-inik kinguneqartussatut missingersimavaa, aningaasalersornissaali siunnersuuteqarfigisimanagu. Eqqumiitsuliornerup eqqumiitsuliorneq periarfissaasa ineriartortitsiffioqqunissaat pillugit isumassarsiaq Naalackersuisunut orniginarpoq, massakkulli piffinni ajornartorsiorfiusuni suliniutinut nutaanut aningaasalersuisussanik nassaarniarsinnaaneq ajornarpoq. Taassuma saniatigut Naalackersuisut periarfissaq iluatsillugu oqaatigerusuppaat 300.000 koruuninik tapiissuteqarnermut aqqissuussinerup aqunnissaanut 500.000 koruunit atornissaat pissusissamisuunngitsoq.

Naalackersuisut taamatut oqaaseqarlutik siunnersuut itigartinneqassasooq inassutigaat.